

TIMOR-LESTE NIA KONSILIASAUN HO AUSTRÁLIA KONA-BA FRONTEIRAS MARÍTIMAS

Iha 11 Abril 2016, Governu Timor-Leste hahú konsiliaun obrigatória ho Austrália tuir Nasoens Unidas nia Konvensaun ba Lei Tasi nian (UNCLOS). Husi ne'ebá kedas, nasaun rua ne'e halo ona pasu bo'ot ho nia objetivu atu hetan akordu ida kona-ba fronteiras marítimas permanentes.

Saida mak konsiliaun obrigatória?

Konsiliaun obrigatória hanesan prosesu ida tuir UNCLOS ne'ebé iha painel konsiliador ida asisti parte Estadu sira hodi hetan solusaun amigável ida ba sira nia disputa.

Bele uza prosesu ida ne'e bainhira iha sirkumstánsia hirak ne'ebé Estadu viziñu sira la hetan akordu ida no Estadu ida halo deklarasaun hodi hasees-án husi jurisdisaun orgaun obrigatória hodi buka rezolusaun ba disputa kona-ba fronteiras marítimas.

Konsiliaun ne'e painel ida ho konsiliador independente nain lima mak halao, ne'ebé ema hanaran Komisaun Konsiliaun. Komisaun ne'e buka atu komprende faktu sira no pozisaun legal husi estadu idak-idak.

Timor-Leste mak nasaun ida ne'ebé hahú uluk konsiliaun obrigatória tuir UNCLOS.

Saida mak ita atinji ona iha konsiliaun ne'e?

Audiénsia sira: Audiénsia prosesusal dahuluk ba konsiliaun ne'e halao iha Haia iha 28 Jullu 2016. Tuir fali audiénsia pública ida iha 29 Agostu 2016, ne'ebé Timor-Leste no Austrália apresenta sira nia pozisaun publikamente. Audiénsia ne'e fó sai direta husi Tribunal Arbitrajen Permanente (PCA) nia website.

Kompeténsia: Austrália dezafia komisaun nia kompeténsia (ne'e mak, legalidade ba prosedimentu sira) durante audiénsia prosesusal ida iha 31 Agostu 2016. Maibé, hafoin ne'e Komisaun desidi ho lian ida deit katak sira iha kompeténsia (ka 'jurisdisaun') hodi rona disputa ne'e no fó sai desizaun ne'e iha 26 Setembru 2016.

Hakotu CMATS: Reuniaun seluk tan halao iha Singapura husi 13 Outubru 2016. Iha reuniaun hirak ne'e Governu Timor-Leste no Austrália konkorda ba pakote medida integradu ida hodi kria kondisaun hodi hetan akordu ida ba fronteiras marítimas permanentes. Hanesan parte ba pakote ne'e, Timor-Leste notifika Austrália iha 10 Janeiro 2017 kona-ba nia intensaun atu hakotu Tratadu Ajuste Marítimu Balu iha Tasi Timor (CMATS), tratadu provizóriu hodi fahe rekursu sira. Tratadu

Komisaun Konsiliaun konsisti husi Embaixador Peter Taksøe-Jensen (Prezidente) (Dinamarca), Juiz Abdul Koroma (Serra Leoa), Juiz Rüdiger Wolfrum (Alemaña), Dra Rosalie Balkin (Austrália) no Profesor Donald McRae (Kanadá no Nova Zelândia).

ne'e sei mate iha fulan 3 nia laran hahú husi data notifikasaun. Timor-Leste no Austrália konkorda katak, tuir fali CMATS nia terminasaun, Tratadu Tasi Timor 2002 no nia kadru regulador sei vigora nafatin tuir nia forma orijinal. Ida ne'e sei fó serteza ba investidor mina sira to'o fronteiras marítimas rezolve ona.

Hapara kazu legal sira seluk: Hanesan parte husi pakote medida integradu ne'e konkorda hodi loka dalan ba negosiasaun kona-ba fronteiras marítimas, Timor-Leste hakotu kazu arbitrajen rua kontra Austrália iha 20 Janeiro 2017, relasiona ho jurisdisaun fiskal no alegada espionajen durante negosiasaun ba tratadu CMATS nian.

Negosiasaun kona-ba fronteiras marítimas: Iha Dezembru 2016, Timor-Leste no Austrália halo kompromisu istóriu hodi halo negosiasaun kona-ba fronteiras marítimas permanentes ho Komisaun Konsiliaun nia apoiu, fó sai iha Deklarasaun Konjunta ida iha 9 Janeiro 2017. Komisaun halao reuniaun tan iha Janeiro 2017 iha Singapura hodi esplora nasaun rua nia pozisaun kona-ba fronteira marítima iha Tasi Timor ne'e tenki to'o iha ne'ebé.

Saida mak sei halo tuir mai?

Negosiasaun ne'e sei kontinua iha tinan ne'e nia laran, bazeia ba konfidensialidade, molok prosesu konsiliaun remata iha Setembru 2017. Timor-Leste no Austrália konfirma tiha ona katak sira sei tuir prosesu ne'e ho boa fé ho vizaun ida atu hetan akordu ida kona-ba fronteiras marítimas iha Setembru.

Se la hetan akordu ida, Komisaun Konsiliaun sei fo relatóriu ida ba Sekretáriu Jeral Nasoens Unidas nian ho rekomendasaun hodi hetan rezolusaun. Austrália no Timor-Leste sei iha obrigasaun atu halao negosiasaun ho boa fé bazeia ba komisaun nia relatóriu.

Oinsa ho Indonézia?

Indonézia no Timor-Leste konkorda tiha ona atu negosia fronteiras marítimas permanentes bilateralmente, tuir lei internasional. Indonézia la hola parte ba konsiliaun ne'ebé agora lao hela ne'e tanba prosesu hirak ne'e só haree deit ba fronteira entre Timor-Leste no Austrália. Rezultadu final husi konsiliaun nian sei la afeta ba Indonézia nia direitu marítima.

Haree informasaun tan kona-ba prosesu konsiliaun nian iha PCA nia website: <https://pcacases.com/web/view/132>



**FIXA
INFORMASAUN
2017**

Aprende tan @ www.gfm.tl ka kontaktu:
Gabinete Fronteiras Marítimas
Konsellu ba Delimitasaun Definitiva ba Fronteiras Marítimas
Governu Demokrátika Repúblika Timor-Leste
e: info@gfm.tl tel: +670 7742 5544



**Gabinete
Fronteiras
Marítimas**